



Senin, 17 April 2024
Ogen: Ester 4:10-17



Erjuang Nehi Sura-sura



Turi turin Ester enggo megati si begi, singuda-nguda si mejile, ukurna pe mejile. Pang ngalaken resiko I bas keputusan si ibahanna. Sekali enda ibabai kita ngidah perbahanen ras sura-sura Mordekai nandangi bangsana si sangana terancam kiniseran si mesangat seh ku kematen. Ngalaken situasi e, Mordekai la tangis saja ngenca. Iukurina ise si banci nampati bangsana gelah puluh i bas kiniseran e nari. Iingetna Ester si enggo jadi ratu i kerajan Persia. Idahina ia amin terjeng pintu gerbang kerajan ngenca, sabap labo banci sembarangen bengket ku istana kerajan e. I je nari isehkenna berita man Ester kerna kecibal bangsana. Latih kal akap Ester meggi berita si ipeseh Mordekai. Tapi mberat kal akapna nampatisa sabap aminna pe ia sekalak Ratu, labo sembarangen banci njumpai Raja adi la bekas persuruhan Raja. Alasen e me ipesehna man Mordekai. Tapi labo surut ukur Mordekai lako mindo penampat man Ester.

Nina Mordekai, "ola iarpakenndu maka kam sikapen asangken kalak Jahudi sideban erkiteken kam ringan i istana. Uga pe lit nge si nampati bangsa enda. Banci jadi guna nampati bangsandu nge maka kam ringan i istana." Bage me Mordekai erjuan mereken pengajuk man Ester gelah igejapna maka ia bagin kalak Jahudi. Janah arus erjuang nelamatkan kalak Jahudi. Selaku bangsa Dibata ugapa pe isampati Dibata nge. Labo pediatna bangsaNa kernep, tapi entah Ester e kin si ipake Dibata jadi dalanNa mulahi bangsaNa?Perkatan Mordekai enda erbahansa gara kal pusuh Ester, lanai tersinikkensa i istanana. Iajukna kerina bangsa Israel ertoto, erpuasa, janah ia pe ras dayang-dayangna erpuas 3 wari dekahna. E maka ijumpaina raja ku istanana amin pe labo itenahken. Ialo-alo raja ia alu mehuli. Bagem perjuangan duana tokoh enda, rikut ras toto guna bangsana.

Labo sia-sia erjuang, lit nge ulihna.

